

小方壺齋

小方壺齋

緬甸志

泰西·著

緬甸國建都阿瓦又謂之馬臘麻原是三國一曰阿瓦一曰阿臘干一曰祕古各不相統恆相爭奪惟緬

甸當衝受害尤重千有六百年

明萬曆十八年

緬甸興兵攻服祕古迨千有七百年

康熙三十九年

祕古復約荷蘭西

洋兩國之兵同攻緬甸屢戰屢勝直抵阿瓦擒獲緬甸之底布王維時緬甸反屬於祕古然緬人強悍

突有阿羅般部落招集土兵恢復阿瓦國都自立爲王盡收緬甸舊地遂出師攻滅祕古國其子山巴領

嗣位後祕古叛山巴領又攻勝之遂乘勝并取暹羅久仍爲暹羅所敗僅存麻六甲以西沿海之麻爾古

底呢色領等城耳山巴領歿其弟皿底臘疑勃老嗣位又并合阿臘干爲一國此外尙有攻取加渣爾加

色等處軍威可謂勅矣然以麻爾古之地皆與孟阿臘接壤孟阿臘屬於英吉利兩國接壤日久復起兵

爭千有八百二十六年

道光六年

英吉利遂起印度之兵攻緬甸恃其習戰視英寇蔑如也然緬軍紀律不嚴

進銳退速以此爲英軍所挫英軍亦不習其水土地險餉艱瘴惡多疾難以深入本欲退師反聲言直取

阿瓦長驅而進緬軍屢阻氣阻遂卑辭求和乃割阿臘干麻爾古達阿依底呢色領沿海之地復償英吉

利兵餉始罷兵然緬甸陸戰全恃堅銳木柵環遶重濠有時英吉利兵馬亦爲其所拒其國賦稅如東方

中國之法以田地錢糧爲正供此外征收外國貿易稅餉不作正項別貯內庫傳聞國王與西洋構畔講

和津貼英吉利軍兵餉嗟咄立辦可見其國之富政事大略與東方各國相同權柄專制於王百官不得

專擅所用律例皆合中華印度兩國之律參酌損益而行職官若翁疑士若敬翁多士若阿達翁士皆在

國都助王理政并有律官出外分轄各部征收賦稅解都供餉部民有事先赴訴麥翁衙門次始上控於

羅都衙門由羅都而達於王以判斷之有烙鐵之刑有呪詛之法斟酌施用與印度略同印度外

南三國俱與印度交界歐羅巴人統謂之印度外

咸知文字惟緬甸語音龐雜有用佛語有用撻撻里音語有用中國音語參雜

而成歐羅巴人不能分其句讀望之如一長句說寫俱難書籍皆編貝葉國王則以象牙為篇頁以金飾邊貼以描金盒并有雕刻成字而金飾之者藏書雖富專以講論神明為主而史記音樂醫學畫譜謂之雜說小書惟安南文學獨遵中國較緬甸暹羅為深奧緬甸屋舍最陋以竹插地用藤繫架用席作牆而苦覆之即謂落成大者不日可完小者頃刻立就雖潦草而便易風雨坍塌既無推壓之虞回祿遇遭亦無蕩質之戚伊底河發源西藏南流經緬甸之麻羅城而入海伊底河即雅魯藏布江即大金沙江也緬甸國東界南掌暹羅西界孟阿臘南界海北界西藏雲南以阿瓦為國都領部落四十有八戶口約四百萬名

阿瓦國都 門額爾 西廩 哥里布 江墩 凍米 拉比那古 巴爾麻 芝補 窮皿 打梗 翁

蔑拉布拉 光墩 那布 磨觀 邊定 拉公釐 高梗 蒙釐布 耶欲河 班沙 巴嚴謬 麻

拉 西格呀都 麻喳布 阿那干 渣嚴 特曩休 蔑都 皿特 新達 比衣謬 呢特 濟騷

麻欲疏 蘭梗 麻喳布 皿巴 麻爾打曼 東俄 底奴彪 波丹謬 哥士皿 衣嚴 知那

麻幾爾 巴三 西利嘎 麻羅大金沙江由此城西入東印度 母哇

緬甸考略

甯波龔 柴著

緬甸南藩大國也別名阿瓦古朱波地在唐曰驃宋元曰緬明洪武間始內附永樂朝使編修張洪至其國嘉靖初外夷以重兵侵之殺其王莽紀歲緬訴於朝遣員前往解釋不聽迨紀歲崩子瑞體起兵洞吾復其地東破南掌南取暹羅攻服鄰封諸部雄鎮西南聲威大震瑞體死應襲繼之萬曆十二年族弟莽灼來歸應襲怒攻之灼奔騰越自是屢爲邊患滇南騷擾無甯歲迨後爲暹羅所攻不暇內犯邊陲因而安謐○國朝定鼎之初首先効順投誠列服乾隆中懷貳犯邊旋仍賓服迄今仍之初國本三分曰阿瓦曰阿臘干曰祕古各不相能互爲爭奪阿瓦適當其衝屢遭蹂躪頗以爲苦萬曆二十八年阿瓦志懷報復突與爭衡遂服祕古垂百四十年相安無事乾隆初祕古復叛血戰十餘稔卒獲全勝直抵阿瓦都生擒其王而國反屬於祕古焉阿羅般以鸞牖繩樞之子揭竿起事招集土兵恢復阿瓦國都自立爲王盡收其舊地又出師攻滅祕古數年祕古又叛王山巴領親征平之遂乘勝取暹羅久之仍受衄敗勞軍糜餉貽他人笑乾隆四十八年血底臘疑勃老立起師攻取阿臘干合爲一國軍威大振會西鄙之民與孟加臘英屬部人屢肇衅致與英人失睦道光六年英人率印度兵來攻緬人恃其習戰視英人蔑如也然紀律不嚴進銳退速卒爲英軍所挫進逼都城緬軍大懼不得已卑辭求和割阿臘干等地與之賠償兵費數百萬兩事始寢咸豐二年又以構衅議和盡失南方祕古等地而目下緬甸疆域僅存彈丸黑子矣其國東西相距約千四百里南北相距較廣東界滇省西界印度南接暹羅祕古及馬耳達萬等印度屬部西北界英屬阿薩密國東南以所屬南掌北陞爲界考其形勢北境岡嵐層疊鳥道崎嶇南則平原寬袤一望無際國中長河聯貫田土膏沃其京都遷徙無常故都曰阿瓦曰安拉補臘曰孟卓包曰滿大來今定鼎於滿大來

國中迭經侵削死亡枕藉之餘子遺人民僅得四兆軀幹修短適中顏面稍形黧黑男女畜髮甚長皆纏髻男子頂前女子頂後居恆露頂無冠尊者之冠前高聳而後斬削男女皆穿雙耳貫金銀環以爲飾男子服長而窄束以巾長至丈有七八尺女子上衣下裙略短而較寬賦性悍勇多詐懈怠成風飲食尙節儉席地無筍與暹羅同王宮富麗民居窪陋植木地上以藤繫架簾席爲牆覆以苫茨大者不日可成小者頃刻立就民樂爲之取其便也俗尙佞佛赴廟燒香十合膜拜每逢大會踴趾相接舉國若狂爭先効力有大事必拘佛賭誓然後可決建廟造塔塑像等役卽貧窶之家莫不慨然捐助多方稱貸勿恤也僧人黃衣髡首沿塗乞食狀貌可憐而國中奉以爲師男童七歲以上皆削髮入寺課讀佛經兼習詩詞經史之學則概付闕如二十歲左右始准還俗各隨其業治斯民者君王懷嚴臨上操生殺之權綜攬朝綱政事下有親政大臣輔政大臣副理政事通事臣各一員部有帥郡有守又下則有土司調司等職祿無常制故賄賂公行肆無忌憚殊非民生之福也

國有大河二東曰潞江一名怒江發源前藏歷雲南入緬南向直流入海西曰伊底河亦自北而南貫通全地入祕古至蘭雲城南入海說者謂潞江卽瀾滄江或曰卽雅魯藏布江及恆河其說非是考輿圖瀾滄江在東自前藏順流而下經雲南入緬屬之老撾卽南掌地纔達屬暹之南掌地卒由東埔塞入海自是而潞江而伊底源分流異昭然若揭殊不可混也至雅魯藏布江及恆河則已深入印度更不可與之淆混考據詳明毋庸贅辨緬甸惟迤北有山南方不概見平原饒腴年中所產輒有盈餘山中多出象虎豹熊等野獸地又產琥珀寶玉象牙檳榔銅鐵鉛錫石油等石油出自深井初汲出時色青厚然之出黑煙想未經濾清故盛產堅木一種屬梗櫨之類取以造舟楫作棟梁堅勁無比累世不朽貨財由生國之寶也

征緬甸記

邵陽魏 源著

滇邊西南爲大理麗江永昌騰越正南爲順甯普洱元江諸府州地斜袤四千里皆與緬甸界而永昌之虎距天馬二關其門戶大金沙江自西藏貫其國入海或言卽禹貢黑水入南海之路也漢朱波唐驪國明初一宣慰司耳萬厯中莽體瑞者吞諸部并臣木邦蠻莫隴州千崖孟密諸土司獨孟養再破緬而卒亦并於緬遂爲貝葉書與中國自稱西南金樓白象土與敵者惟南掌暹羅景邁古刺諸國及莽應裏爲劉綎鄧子龍所破擣阿瓦降酋帥其後巡撫陳用賓又約暹羅夾攻屢破之由是不敢內犯惟雄長諸部如故與暹羅及古刺景邁世仇明永厯入緬時其遺臣散入各國有馬九功者爲古刺招明潰兵三千有江國泰者暹酋妻以女各遣使約李定國於孟良將犄角夾攻緬而○大清兵取永明王於阿瓦於是李定國發憤死二國之師失望而返緬自負有獻俘功益蔑視諸土司竟國於西南不臣不貢雍正九年景邁使至普洱求貢乞視南掌暹羅雲貴總督鄂爾泰疑而卻之景邁者世所傳八百媳婦國也居景邁城者爲大八百居景綫城者爲小八百在緬甸國東戶十萬明世與緬同爲宣慰司中滅於緬旋恢復故世仇也畏緬之逼求通中國以自重緬恃其得內屬也密遣人至車里土司探虛實適遇南掌國貢使劉藻知景邁貢被卻則大喜陽言緬來歲亦卽入貢旋興兵二萬攻景邁而貢竟不至其國都曰阿瓦兼有十三路南路近海爲洞吾古刺北路爲孟密孟養孟拱其東路爲木邦孟良絕長補短約三千里其孟密之蠻莫新街老官屯爲金沙江達阿瓦之道直永昌虎踞關外明桂王舟行入緬之路也其東木邦孟良在耿馬土司滾龍江南直普洱邊外地稍平李定國吳三桂趨阿瓦之路也緬稱君長曰莽故木邦孟良亦名莽國云乾隆十九年緬酋莽達刺爲錫箔諸夷所滅有木疏土司雍籍牙者雅一作鑾以雅讀去聲而誤也考緬酋來文稱相傳起兵克復阿瓦盡臣諸部

惟桂家與木邦二王司抗不服遂與緬治兵相攻二王司敗先後走孟坑桂家者故明桂王官族之裔也

世據波竜銀廠富甲諸部其酋宮裏鴈

一作古利宴

既敗竄近邊其孥與賄爲孟連土司刀派春所奪桂酋妻

曩占襲殺刀派春而自歸於中國宮裏鴈尚在孟坑不知也我永昌知府楊重穀又誘致而戮之以爲功

於是緬酋益無忌浸尋而及我耿馬土司且以兵來邊外索木邦逆酋矣曩占走依孟良嶺令內侵及普

洱南江外諸土司地邊民一日數驚我兵敗之走求助於木邦曩占復爲鄉導內犯我總兵劉得成等三

路皆敗總督劉藻自到死時乾隆三十年普洱邊外之警也明年大學士楊應琚來督滇會普洱賊漸退

得以其間收取孟良諸地分隸土目部署略定而永昌邊外之孟連土司復以緬警告初我土司之近緬

者皆於緬私有年例自木疏據國後諸土司以其故等夷不復肯屬而緬方與桂家木邦諸夷自相攻亦

未暇遠問也及桂家木邦敗竄我邊更不扶植之反爲助翦所忌遂漸及我內屬諸土司孟連之先故緬

支屬不胥臣新緬而曩占兼怨孟連與緬欲搆使相鬪而受割於中國至是緬以兵徵其歲幣揚言將渡

滾龍江亦與中國無與也而撫臣常鈞奏請普洱事畢當卽辦永昌邊外賊於是楊應琚移駐永昌屬吏

喜功者遂爭言緬甸可取狀知騰越州陳廷獻者遣人招孟密土司不聽則誘致其所屬之孟欽土目來

降使虛獻孟密又招致木邦故土司子弟之在孟坑者使虛獻木邦遂以外收二大土司地千里戶十數

萬入告其實孟密木邦二部自在緬地非二姓所能獻也副將趙宏榜以兵數百襲蠻莫之新街克之而

其地扼金沙江水口緬與中國五市處據阿瓦上游又爲賊必爭之地不旋踵陷於賊賊數萬尾而入直

薄隴川之虎踞關提督李時升檄諸將禦之關外屢戰殺傷相當輒以大捷奏賊復分兵繞入萬仞關掠

永昌騰越各邊越隴川江而出會賊遣人請和約五市罷兵諸將許諾賊渡猛卯江去兵可以罷矣而我

所奏新收諸土司地無以報命於是李時升復檄諸將哈國興等進復新街蠻莫阻於賊不能進楊應琚

所奏新收諸土司地無以報命於是李時升復檄諸將哈國興等進復新街蠻莫阻於賊不能進楊應琚

亦檄總兵朱崙等進據木邦城空無人自宛頂運糧以給瘴癘方興而賊大集軍潰歸時三十二年四月也於是楊應琚奏得不償失請棄新附諸土司地○○上逮楊應琚李時升等治罪時緬酋雍籍牙死其子孟駁實無內犯心諸邊臣張皇啟疊先後獲咎兵可以罷矣而其情不盡上聞○○上命明瑞以將軍兼總督發滿洲兵三千及雲貴四川兵二萬餘大舉征緬明瑞由木邦孟良攻東路參贊額爾登額由孟密老官屯攻北路約會於阿瓦以九月二十四日啟行連旬雨潦又負糧以牛不能速至芒市易澤糧以行十一月二日始出宛頂越八日整隊至木邦守賊望風先遁留參贊珠魯訥按察使楊重英以兵五千守之通餉道明瑞自率兵萬二千爲浮橋渡錫箔江賊軍二萬嚴壘蠻結以待領隊大臣觀音保摩眾先據山左哈國興等三路登山俯薄之一呼直偪其壘黔兵十餘踊而入眾乘之賊披靡遂拔其柵復連破三壘而十二壘之賊皆宵遁賊復拒守天生橋我師繞道夾擊殲二千餘大獲糧械軍聲大振進至象孔迷失道而軍糧已罄明瑞念北路軍約由孟密入其地近孟籠有緬屯糧乃議向孟籠果大得糧濟軍時已深入二千餘里會歲除而孟密北路之師無消息復議取道大山土司向木邦以歸盡焚孟籠餘糧緬自去冬象孔改道後獲我病卒知我軍糧盡不向阿瓦卽悉眾來迫我軍且戰且行每日先以一軍拒敵卽以一軍退至數里外成列待軍至則成列者復迎戰明瑞及觀音保哈國興更番殿後步步爲營每日行不三十里自象孔至小猛育二千餘里之地凡六十日而後至其中又有蠻化之捷時我軍山巔賊卽營於山半明瑞以賊輕我甚不可不痛創也時賊識我軍號每晨我軍吹波淪者三而起行賊亦起而追我次日五鼓復吹波淪三則我軍盡出營伏簪以待賊聞波淪聲爭上山來追萬鎗突出四面霆偪賊無走路潰墜者趾頂相藉坑谷皆滿殺賊四千餘自是每夜遙屯二十餘里外不敢近明瑞休軍蠻化數日取所得牛馬犒士而賊之先一日過者已壘於要路得波竜人引以間道由桂家銀廠舊址而出會

賊之分路襲木邦者已潰我木邦之師戕珠魯訥執楊重英於是木邦之賊亦至額爾登額之進孟密也
中途阻於老官屯之賊頓兵月餘○○上以明瑞久絕軍報趣額爾登額移師援之於是老官屯之賊亦
至明瑞行抵小猛育賊已蜷集數萬我軍尙分七營距宛頂糧臺二百里而額爾登額之援不至明瑞乃
令軍士乘夜出度皆得以自達而自與諸領隊大臣及巴圖魯侍衛數十人率親兵數百斷後及晨血戰
萬賊中無不一當百俄領隊大臣札拉豐阿中鎗死巴圖魯侍衛皆散明瑞觀音保死之二月十日也事
聞○○上以額爾登額擁重兵既不能進取孟密以赴將軍之約及退軍旱塔聞木邦告急可由旱塔間
道往援總督鄂甯駐永昌七檄不應領隊侍衛海蘭察自請往援亦不許翻迂道回銅壁關內致木邦參
贊之師潰於賊而於內地積餉之宛頂數程可達者又繞道行至半月致旱塔之賊皆萃大營而將軍復
陷於賊情罪重大置極典并斬提督譚五格明瑞自去冬轉戰緬中數千里以寡敵重令嚴士死餘威震
緬緬人懼再討使攏夷轉達貝葉書請罷兵又附書被虜軍士求和副將軍果毅公阿里衮以聞○○上
以明瑞軍入關者尙逾萬所喪亡不過十之二三然將帥親臣皆捐軀而緬夷求款未親遣頭目非大舉
無以雪忠憤先命阿里衮鵬勦以懼之三十四年春大學士忠勇公傅恆請督師○○命爲經略阿桂阿
里衮爲副將軍發索倫吉林兵四千健銳火器營四千荊州成都駐防滿兵五千厄魯特鄂倫春各三百
赴軍傳恆以四月朔至永昌騰越議進兵之路以阿瓦城在大金沙江之西若由東路錫箔江進則阿瓦
仍隔江外乃議大軍從金沙江上游之戛鳩江亦曰蘭鳩江經孟拱孟養兩土司地陸行直擣阿瓦而偏
師卽由東岸夾江而下進取孟密而造舟於蠻莫以通兩軍聲勢時距霜降尙早經略急於出師謂師老
則氣懈不如及其銳用之遂以七月二十日大軍啓行渡戛鳩江而西孟拱孟養各獻馴象四牛百頭糧
數百石緬方秋成刈穫未暇集兵又孟拱孟養非其腹地故歷二千里皆不血刃而士馬觸暑雨已多懈

病又道路不習難深入惟阿桂東路軍萬餘新從虎踞關出精銳可用會九月下旬蠻莫野牛壩新造戰艦成閩粵水師亦集乃議兩軍并歸一路經略耀兵諸土司地而還亦以十月朔渡江抵蠻莫由蠻莫江出金沙江賊已列舟扼江口水陸來犯一軍營江灘二軍分據兩岸哈國興將水兵阿桂阿里衮各將陸兵分趨兩岸東岸陸賊先至阿桂令步兵矢銃兩發而勁騎左右衝入賊大潰哈國興及海蘭察率舟師乘上游上風蹴之賊舟自相撞擊殺溺數千江水爲赤阿里衮亦敗西岸之賊三路皆捷而經略及阿里衮已病諸將議不向阿瓦惟老官屯有賊壘爲前歲額爾登額頓兵處欲取之以蔽事老官屯臨大金沙江賊分扼江之東西而我師逼其東寨寨據大坡周二里地邇插於江柵皆鉅木入土甚深外周以三濠濠外又橫臥大樹銳其枝末外向此緬夷拒敵之長技也我軍先築土臺以大礮擊之柵木堅偶折輒補哈國興乃伐箐中數百丈老藤維以鐵鉤令敢死士夜往鉤其柵三十人曳藤以裂之爲賊斧斷經略又命火攻先爲捍牌禦鎗礮一牌可護數十人昇以兩人眾挾膏薪隨之百牌齊進踰濠抵柵忽火回風反遂卻最後穴地及其柵底實火藥轟之柵突高起丈餘賊壕駭震天我軍皆挺刃以待俄柵忽落平又起又落者三不復動蓋柵坡迤下而地道平進故土厚不能迸裂也然賊自是震懼柵有水門通江阿桂又撥戰艦五十越柵截其餉運賊益懼其渠帥遣人立柵上遞緬文請和願結幕兩軍適中地親來受要約阿桂集諸將議進止皆主和乃遣使往責以進表納貢歸逃人反土司侵地緬則欲我歸其木邦孟養孟拱三土司議未決賊帥左顧而去哈國興單騎入其柵賊帥不見別遣人出謝請如約時阿里衮已卒於軍經略又病足退居銅壁關○○上以大軍再舉再破賊已足張國威不忍將士久冒瘴癘諭經略班師適緬酋遣使十四人齎貝葉書詣經略饋獻方物自陳請入貢遂允老官屯之議班師遷孟拱土司於關內棄關外地留副將軍阿桂於雲南而緬旋背約不入貢亦不還所羈官兵論者謂新街江口順流六日

可至阿瓦使舍戛鳩江之行程與攻老官屯之日力以擣阿瓦有餘劉綎白文選再攻阿瓦皆輒破非堅城也卽爲城下之盟而還亦必能制其死命稱臣請貢無反側若老官屯偏在東岸止需留偏師羈縻之非能阻我邁進此與唐太守頓兵安市城不直趨平壤者何異是役以出師過早失天時以頓兵堅壘失地利以多調客兵少募土勇失選士亦小夷氣數未燭天姑少延之歟

水道提綱曰雲南通緬甸諸夷水路惟知有金沙江可通大舟不知

潞江車里一派可通擺古關鎗砲一派可通八百交趾皆可舟可航之水經理南夷者不可不諳此也

三十五年老官屯目移書索木邦蠻莫孟拱三土司

副將軍檄責之緬復留我都司蘇爾相○○上以緬負險知我師限於天時地利故敢倔強○○勅阿桂

於秋冬酌遣偏師擾之使奔命不暇而緬方南向用兵暹羅阿桂請乘此大舉征緬奉○○嚴謹能免以

溫福代之明年金川反溫福阿桂皆赴四川於是暹羅滅於緬三十八年緬目得魯蘊至老官屯請如前

約遣孟邁等入關議中國方急金川不暇問緬酋孟駁旋死子贅角牙立四十一年兩金川平緬懼請入

貢願出楊重英蘇爾相求開關互市明年出蘇爾相而楊重英不至大學士阿桂李侍堯赴滇勘邊界益

兵備四十七年其荷孟魯殺贅角牙而自立國人又殺孟魯而立孟雲孟雲者雍籍牙季子少爲僧前此

兵費皆未預聞也而值暹羅之難乃思附中國暹羅者居緬西南海與緬世仇緬酋孟駁於乾隆三十六

年滅之而緬自連年抗中國後耗費不貲又其土產木棉象牙蘇木翡翠碧璽玳瑁及海口洋貨波竜廠銅

恃雲南官商采買者皆閉關罷市緬加戍東北而力戰東南其用日絀既并暹羅徵取無貳乾隆四十三

年暹羅遣民憤緬無道推其遺臣鄭昭爲主起兵盡復舊封又興師侵緬地於四十六年航海來貢告捷

○朝廷不使亦不止也至是昭子華嗣立亦材武緬酋孟雲不能支乃東徙居蠻得五十一年○○詔封

華暹羅國王於是緬益懼五十三年由木邦齎金葉表馴象金塔款關求貢并歸楊重英等表言已嗣國

後深知孟駁父子前罪久欲進貢因暹羅侵擾是以稽遲乃○○諭暹羅能兵五十五年遣使貢○○八

旬萬壽乞○○賜封并乞開關市許之遣使○○封爲緬甸國王定十年一貢嘉慶十年秋暹羅貢表又言方出師攻緬獲捷復○○頒勅諭解之是冬緬甸叩關求入貢疆吏以非貢期卻之而西南邊自是無緬患奉貢不絕

蠻夷之性畏威甚於懷德畏沿邊土勇甚於官兵畏鄰部之強又甚於畏中國其巢穴僻處海澨中國孟冬出師仲春避瘴當返勢難以五月之久犁數千里之庭故夜郎倔強悉索敝賦以奮螳臂之拒一聞兩金川滅而震疊求貢再聞暹羅封而稽首請臣三聞暹羅見親於中國且非貢期而貢媚蓋前明萬厯中滇撫陳用賓嘗約暹羅夾攻緬其國幾覆李定國又嘗約暹羅古剌將夾攻緬是其傷弓覆車之戒震鄰切膚之災於以知暹羅之大可用也次則膽越野人亦平緬勁旅彼其水土氣力皆同非若中國之限於險遠又暹羅景邁皆緬世仇誠能水陸並舉新街則以野人土兵爲前驅海道則以暹羅景邁爲犄角使首尾不顧必可一舉殄滅鄂爾泰不知用景邁去緬所忌始偃蹇於南徼滇更不知用貴家及茂隆廠而緬遂駸淫於內地及阿桂久習滇事思用暹羅而又值○朝廷厭兵之時孫士毅復不知用暹羅而失安南於垂得用兵者其可不中賊所忌馭夷者其可不眾建而分其勢哉且萬厯中滇人又嘗用孟養制緬矣孟養斷緬餉道緬酋一軍飢困垂斃止待滇兵二千塞隴川之路而巡撫王凝檄止之使賊得外援間道逸去致孟養反并於緬緬遂尾大不掉夫字小者大國之仁伐交者上兵之智是以反復於前代以蠻攻蠻之成效而知蚌鷸相持漁者坐利固不在勤天下之力以求之也

緬事述略

趙州師 範著

明初緬甸爲八宣慰使之一至莽瑞體吞并諸土司而始強及萬厯十年劉綎鄧子龍大破之直抵阿瓦自是賊稍斂二十三年巡撫陳用賓用暹羅間緬由是緬復衰迨至順治十八年莽猛自立戕永明王君臣自是不通中國者六十七年雍正七年與整賣搆兵求進貢而不果蓋百十年來中國幾不知有緬甸矣至乾隆十一年而吳尚賢出吳尚賢者石屏州民也家貧走廠抵徼外之葫蘆國其酋長大山王蜂筑信任之與開茂隆廠廠大贏厥例無尊卑皆以兄弟稱一人主廠次一人統眾次一人出兵時尚賢爲廠主其第三人則黃耀祖也廠既旺聚眾至數十萬一有警則兄弟全出尚賢身瘦小然臨陣輒先鬚雖少皆擢起見者無不驚走廠徒多才力數百斤礮可手挽而發之凡在夷方開廠者互相聯絡有夷眾憎某廠欲攻之而憚茂隆阻用重幣假道尚賢陽許而陰告某廠使備之夷大敗回過茂隆截之無一脫者所獲不可勝計眾大歡飲讌中酒尚賢大哭不止眾驚請故尚賢曰吾與眾兄弟忍飢寒開此廠今一旦有此無妄財懷父母妻子各思歸我一人能支乎爲蠻有矣於是諸人各被酒爲豪舉盡探懷中所掠者棄之淵其操縱人皆類此諸莽賊皆緬也畏之甚不敢侵然尚賢爲人陰賊戾深黃耀祖心不善之謂此非可久與處也乃謀自脫因請假徒往山獵尚賢許之乃以其徒入葫蘆獵所得禽時以遺蜂筑蜂筑不之虞也一夜遂破其國而有之尚賢屢招其歸不答先是尚賢之鄰有某者性忠實曾爲武弁頗識字會以事革不能自存往省尚賢尚賢雖豪然故廠徒不識官府事某因以進貢說之可邀恩得葫蘆國王尚賢正無如黃耀祖何聞若言卽心動某因爲稟介耿馬土司罕世屏獻茂隆廠抽銀課時銀之出不可思議公私大充當是時羣蠻最畏者茂隆吳尚賢與貴家宮裏鴈貴家者故永明入緬所遺種也緬劫永明時諸人分散駐沙洲蠻不之逐謂水至盡漂矣已而水至洲不沒蠻其神之百餘年生聚日盛稱貴家兵力

強羣蠻畏之廠力弱不能支蠻者丐請卽往時亦有敏家大抵貴家之與也宮裏鴈貌偉而怪滿面皆茸每鬪矢石不能及身故爲蠻所畏時與緬酋隙尙賢伺間入緬欲和之不聽因搆緬與貴家戰不勝乃說其酋莽噠喇以進貢假威重可陰爲己地緬乃從所言十六年進京貢十象并諸物究不能得葫蘆割付怏怏回已稟辭大府西行矣忽追回餓死之尙賢死而廠徒散羣蠻自是輕漢人矣時莽噠喇不道十七年敏家破阿瓦走噠喇入據其城有甕籍牙者木梳之頭人也十八年九月與貴家戰勝之遂敗敏家十九年正月噠喇爲得楞子所殺甕籍牙敗得楞自立於木梳尋徙阿瓦以力脅服諸土司且擊賊敗波龍廠走貴家遂篡緬甸莽氏絕二十五年甕籍牙死其子孟緒嗣與各部搆兵如故二十七年宮裏鴈爲所追率其下謀內附而孟連土司刀派春苛索之宮裏鴈不受土司約束會石牛廠周彥青相招宮裏鴈乃置其妻子曩占及男婦千餘人於孟連而自赴廠宮裏鴈既去刀派春乃分散其人於各寨而置曩占及二女於城中曩占知入牢籠潛語其人但望城中火發來接應耳已而派春索其畜產卽與之索其次女卽與之索其長女卽與之乃索曩占曩占怒乘夜進其家手刃三十餘口遂縱火其徒見火光盡集偕撒拉朵等奔孟養遂歸緬甸而裏鴈實不知之也永昌守楊重毅聞變欲以宮裏鴈爲功乃佯好近之宮裏鴈將行妾卜之不吉勸毋往不聽因泣而從之至永昌至省不敢輕動也獄已具殺之於甕城妾亦死之而緬禍自此起矣滇人每言吳尙賢宮裏鴈若在豈有邊禍其說雖未必盡然然足以見邊地之情形能保廠者卽防邊也宮裏鴈與木邦相依倚旣死木邦遂降緬擾邊明年遂犯猛籠殺土目三十年時犯九龍江出入無忌然不過小蠢動而已未至攻塞圍城也而大員舉動張皇輒自往以罹禍機三十一年三月總督劉藻至於自殺迨楊應琚至事已靖矣而聽副將趙宏榜之說生事邀功至於新街敗衄邊事無甯日矣三十二年楊應琚逮入都而以承恩公明瑞代九月進兵分兩路明瑞由木邦進額爾登額由老

官屯進明年正月明瑞歿以忠勇公經略三十四年經略至於師緬人乞降遂班師按緬酋之先於漢則有雍由調於唐則有雍羌前明則有雍罕於今則有雍籍牙雍蠻同音其屢次差授緬文每稱相傳一千七百餘年蓋自漢和帝永元九年戊戌雍由調受金印紫綬以至於今乾隆庚戌凡一千六百九十三年也自明莽瑞體開疆蠶食凡隸我邊圉如木邦蠻驍猛拱猛養密景綫景邁孟艮及大小古喇等部落雖叛服無常無不攝其兵威聽其驅使故知眾建而少其力爲制邊馭夷之要術也緬地近佛郎機貢埠非佛郎機之本國也西洋貨物聚於漾共閩廣皆通火器皆西洋製法用兵號令精嚴勝則賞甚厚賜名號爲官負則殺無赦於軍前逃回者將其家小全行抄殺故有逃者其家必令之出無敢逃者各頭目無俸隨其貿易以取利漢人亦不任用其地有漢人街則擇漢人爲街長其性多疑犬羊性也所服一人始終不變總兵哈國興自林岡寨角勝爲所畏服故每乞和必求見哈國興得魯蘊尤與之熟蠻性如此是舉也一壞於刀派春楊重穀之貪殺再壞於劉總制楊閣老之張皇三壞於辦理軍糧者之草率明將軍徒提孤軍餉運不繼進退兩難雖額爾登額果能如期終難徑抵阿瓦不得已遂以身殉忠勇公以經略莅事精詳審慎士飽馬騰柰暑月進兵雨阻瘴興有地利而無天時焉然受款息師邊民受其賜矣大抵緬穴於滇之西南天則炎溽煩蒸地則水土惡劣粵爲前門滇乃後戶如必盡榛荆而披荆之粵以舟師搗其巢滇以屯練奪其隘約十土司各自爲戰斯可矣爨龍顏碑云緬戎寇場是緬已見於劉宋現今緬酋孟隕奏改阿瓦王名號薄緬弗居蠻也孟也蒙也音可相通孟氏其亦蒙之末裔歟按樊綽雲南城鎮志如鎮西越禮銀生開南接吐番界彌臣達波斯鄰小婆羅門諸部必四五譯乃通大理所稱望苴子卽騰越之野人倘撫而用之實平緬勁旅云